



**Suliffeqarfiit nutaat aallarnisaasut akileraartarnikkut qanoq oqinnerusumik qanorlu pisortaniit ikorfartorneqarsinnaanerit pillugu apeqquteqaat aallaavigalugu Inatsisartunut oqallisissiasatut siunnersuut.**

(Inatsisartunut ilaasortaq Peter Olsen, Inuit Ataqatigiit)

Ajoraluartumik sunannguaq pineqalersorlu pisortat akuliunneqarnissaat eqqaaneqartarpoq. Pisortat akuusussaannngillat. Pisortat sinaakkusiissapput inuutissarsortut namminersortut aamma aallarnisaasartut sapinngisamik paasiuminartunik pitsaasumillu atugaqarnissaannut.

Naliginnaavoq sulliviit aallarlerlaat amerlanersaasa ukiumi siullermi amingartooruteqartarnerat - taamaattumik iluaqutaangaarnaviannngilaq akileraarutitigut oqilisaavigineqassappata. Akileraartarneq eqqarsaatigalugu Demokraatini isumaqarpugut pingaarnerpaasoq aallarnisaasartup ilisimassammagu akilersinnaassasoq sulerulunnissaq suliffik ingerlallualeqqullugu. Tamanna ilaatigut pisinnaavoq akileraarutitigut suliffiit artukkarsuinnginnissaannik qularnaarinikkut, sulliviit sinneqartooruteqartarlutik ingerlalleraangata. Taamaattumik isumaqarpugut ingerlatseqatigiiffiit akileraarutaat 20 procentinut appartinneqartariaqartoq suliffinnut tamanut atuuttussanngorlugu - tamanna sapinngisamik sukkanerpaamik sinneqartooruteqalerumalluni ilungersornissamut kaammattuutaassagaluarpoq.

Sulliviit aningaasarsiornerat ataatsimut isigalugu ukiumi marlunni pingasuniluunniit sullivinnik akileraartitsinngierarluni kingorna qaffasippallaarujussuartumik akileraartarnermut procentilersuisarneq iluaqutaanngilaq - iluaqutaanerussagaluarpoq ingerlaavartumik appasissumik ingerlatseqatigiiffiit akileraartinneqartartuuppata.

Tamatuma saniatigut isumaqarpugut pisortat ikorfartuisariaqartut aallarnisaasartunut pitsaasunik sinaakkusiornermikkut. Aallarnisaasartut illuini inissamik neqerooruteqartoqarsinnaavoq imaluunniit nalikilliliisarnermut malittarisassat pitsaanerusut neqeroorutigineqarsinnaapput. Kingunerissavaa attartornermut akiliisannginnissaq imaluunniit appasissumik akiliisarnissaq kiisalu suliffiutip ingerlallualernissaata pisariaqartitaanut tunisassianut aningaasaliinissamut periarfissarissaarnerulernissaq.

Aamma pisortat ikorfartuisinnaapput siunnersuullutik ilitersuullutillu, aallarnisaasartut sullivimmik pilersitsinerminni iluatsitsilluarnissaminnut sakkussaqaarneruleqqullugit. Siunnersuineq tamanna tunngaviummik piffissami aalajangersimasumi akeqanngitsumik ingerlanneqarsinnaavoq soorlu ukiumi ataatsimi aamma aqqissuussisoqarsinnaavoq assersuutigalugu quleriarluni akunnermi ataatsimi ataatsimeeqatigiittarnikkut imaluunniit arlaannik assigusumik aqqissuussinikkut.

Nunatta aallarnisaasartut amerlanerit pisariaqartippai aamma taamaattumik manna ullumi oqallinnerput pingaaruteqarpoq. Demokraatini kissaatigaarput kusanartumik oqallittoqarumaartoq aamma qilanaarpugut partiit allat isumaasa tusarnissaannut.